




ხაშურის მოაზრება



№12 (483) 7 აპრილი, ორშაბათი, 2025 წელი

დღეს ხარება, გილოცავთ!

ღვთისმშობელი ქალწულო, გიხაროდენ, მიმადლებულო მარიამ, უფალი შენთანა, კურთხეულ ხარ შენ დედათა შორის და კურთხეულ არს ნაყოფი მუცლისა შენისა, რამეთუ მაცხოვარი გვიშევ სულთა ჩვენთა.

ერთ-ერთ უდიდეს საუფლო დღესასწაულს, რომელსაც წმიდა ეკლესია 25 მარტს (ახ. სტილით 7 აპრილს) აღნიშნავს, ხარება ეწოდება. ამ დღეს ყოვლადწმიდა მარიამთან ერთად მთელ კაცობრიობას უწყა, რომ სახიერმა ღმერთმა ადამიანი სიკვდილისა და ცოდვის სამუდამო ტყვეობისათვის ვერ გაიმეტა და ეშმაკის მონობისაგან მისი გამოხსნა გადაწყვიტა. ეს დღე არის დასაბამი „ჩვენი ცხოვნებისა და გამოჩინება საუკუნოთიგან დამალულისა საიდუმლოსა“.

უფალმა იესო ქრისტეს შობამდე დიდი ხნით ადრე აღუთქვა კაცობრიობას, რომ მხსნელს, მესიას მოუვლენდა, რომელსაც შობდა ქალწული და



უწოდებდა სახელად ემანუელს, რომელიც ითარგმნება როგორც „ჩვენთან არს ღმერთი“. ჭეშმარიტად, ღვთის განკაცებით ჩვენთან არს ღმერთი.

და აი, მიავლინა უფალმა მთავარანგელოზი გაბრიელი გალილეის ქალაქ ნაზარეთში ქალწულ მარიამთან, რომელიც დაწინდული იყო იოსებზე, დავითის მოდგმის შთამომავალზე.

წარუდგა ანგელოზი ქალწულს და უთხრა: „გიხაროდენ, მიმადლებულო, უფალი შენთანაა. კურთხეულ ხარ შენ დედათა შორის“. მარიამი შეაძრწუნა მისმა სიტყვებმა და გაიფიქრა: „ვითარ-მე არს მოკითხვად ესე?“ - რას უნდა ნიშნავდეს ეს მოკითხვაო? ანგელოზმა უთხრა: „ნუ გეშინინ, მარიამ, რამეთუ ჰპოვე მაღლი წინაშე ღმერთისა. და აჰა, ესერა შენ მუცლად-იღო და ჰშვა ძე და უწოდი სახელი მისი იესუ“.

მარიამის ძეს ღმერთი დავითი საყდარს ანუ ისრაელის სამეფო ტახტისა და იაკობის სახლზე - ისრაელის თორმეტ ტომზე - საუკუნო (მარადიულ) სუფევას აღუთქვამს. მარადიული მხოლოდ ღმერთია, ხოლო „იაკობის

სახლი“ უფლის მხილველი, მორწმუნე ერია, რომელიც სულით უფალთანაა შეერთებული.

ადამიანის გონებისათვის მიუწვდომელია ქალწულისაგან უმამაკაცოდ შობა. ღვთისმშობელი, რადგან ქალწულების აღთქმა ჰქონდა დადებული, იკითხავს: „ვითარ-მე იყოს ესე ჩემდა, რამეთუ მე მამაკაცი არა ვიცი?“ ანგელოზი მიუგებს: „სული წმიდაა მოვიდეს შენ ზედა და ძალი მაღლისა გფარვიდეს შენ“, - და ნიშნავს აძლევს: მისი ნათესავი, მოხუცი ელისაბედი, უკვე შეექვსე თვეა, რაც მიდგომილია.

მარიამმა, როცა ყოველივე გამოწვლილვით გაიგო, დამორჩილდა, მიენდო უფალს და ღვთის ნებას თავისი ნება შეუერთა: „აჰა მხევალი უფლისაა, მეყავნ მე სიტყვისაებრ შენისა“. და მეყსეულად შევიდა სულიწმიდა ქალწულის შუგინებულ ტაძარში.

რითი დაიმსახურა ქალწულმა მარიამმა ესოდენი მაღლი ღვთისა, რომ ადამის მთელი მოდგმიდან სწორედ ის აირჩიეს ღვთის განხორციელების მსახურად? იმით, რომ იგი ყოველი სათნოებით იყო შემკული, რამდენადაც ეს ადამიანის ბუნებისთვისაა შესაძლებელი, და იყო ჭეშმარიტი ტაძარი ღვთისა. განსაკუთრებით აღნიშნავენ მის სიმდაბლესა და სიმშვიდეს - სწორედ ამ სათნოებათა გამო გამოირჩია იგი უფალმა.

ქალწულ ღვთისმშობელზე ასეთი გადმოცემა არსებობს: როდესაც იგი ესაია წინასწარმეტყველის წიგნს კითხულობდა, იქ, სადაც წერია: „აჰა ესერა ქალწული მიუდგეს და შვეს ძე და უწოდონ სახელი მისი ემანუელი“, - თურმე შეყოვნდა, გაიფიქრა, რა ნეტარი იქნება ის ქალწული, რომელზეც ეს ითქვამო და ღმერთს შევედრა, მისი ხილვის ღირსი გამხდარიყო, რათა მხევალივით მომსახურებოდა მას.

სწორედ ამ სიმდაბლის გამო იყო, რომ მთავარანგელოზმა ესოდენ სულგრძელად დაუთმო ქალწულ მარიამს, რომელმაც ზეციურ მახარებელს ნათქვამის დამტკიცება და ახსნა მოსთხოვა. არცთუ დიდი ხნის წინ გაბრიელი მღვდელ ზაქარიას გამოცხადდა და შვილის შეძენა ახარა, მაგრამ მღვდელმა არ დაუჯერა, რადგან ისიც და მისი ცოლიც ღრმად მოხუცებულნი იყვნენ. მთავარანგელოზი განურისხდა მას და დააღუმა, ვიდრე წინასწარმეტყველება ახდებოდა. ყოვლადწმიდა ქალწულს კი არამცთუ არ უსაყვედურა, არამედ დიდი კრძალვითა და მოთმინებით დააჯერა იგი და არ განეშორა, სანამ მორჩილებითა და სასოებით აღსავსე სიტყვები არ გაიგონა მისგან. მიზეზი ის გახლდათ, რომ ზაქარიამ თავისი ეჭვით ღრმად დაფარული ურწმუნოება გამოხატა, ყოვლადწმინდა მარიამმა კი - მორჩილება და სიმდაბლე.

ღმერთს არ სურდა, იძულებითა და შიშით ადგასარულებინოს რომელიმე საქმე ან, პირიქით, დაგვიშალოს რაიმეს კეთება. იგი გულმონყალა, სამართლიანი, წმინდა და სურს, ჩვენც ასეთივენი ვიყოთ, მაგრამ კი არ გვაიძულებს სიკეთეს, არამედ შეგონებით, დარიგებით, სწავლით, სიყვარულით მივყავართ მისკენ. მას სურს, რომ ჩვენი ნებით აღვასრულებდეთ ყოველ კეთილ საქმეს.

რა იარაღითაც იღვაწა ეშმაკმა ჩვენი დაცემისათვის, იმავე იარაღით გვიხსნა ქრისტემ; თუევას საქციელმა ადამის მოდგმას ცრემლი მრავალგზის დაადინა, ქალწულმა მარიამმა უდიდესი სიხარული მოუტანა. ღვთისმშობლის ერთ-ერთი ეპითეტია „განმანათლებელი“, ნიშნად იმისა, რომ სიბნელეში მყოფ კაცობრიობას მის მიერ გამოუბრწყინდა მზე სიმართლისა და მორწმუნეთა გონება განანათლა.

მუნიციპალიტეტის საკრებულოს სხდომა

3 აპრილს, ხაშურის მუნიციპალიტეტის საკრებულოს მორიგი სხდომა გაიმართა ნინო ლიპარტიანიანის თავმჯდომარეობით.

საკრებულოს გადაწყვეტილებით, დაბა სურამში, გვერდისუბნის დასახლებაში მდებარე უსახელო ქუჩასა და მიმდებარე შესახვევებს მიენიჭა საქართველოს ხელოვნების დამსახურებული მოღვაწის, რევაზ თაბუკაშვილის სახელი;

ამავე დასახლებაში მდებარე ამაღლების ქუჩის ერთ მონაკვეთს ამაღლების I შესახვევის სახელი მიენიჭა;

აგრეთვე, დაბა სურამში, ბუღაურის დასახლებაში მდებარე უსახელო ქუჩასა და მის განშტოებებს მიენიჭა „ბერი გაბრიელ სალოსის“ სახელი;

დღევანდელ სხდომაზე მოისმინეს საკრებულოს სამანდატო, საპროცედურო საკითხთა და ეთიკის კომისიის ანგარიში 2024 წელს გაწეული მუშაობის შესახებ.

ასევე, მოისმინეს მერიის საფინანსო-საბიუჯეტო სამსახურის ანგარიში ხაშურის მუნიციპალიტეტის ბიუჯეტის 2024 წლის 12 თვის შესრულების შესახებ, რომელიც წარმოადგინა მერიის საფინანსო-საბიუჯეტო სამსახურის ხელმძღვანელმა ლელა მაჭარაშვილმა.



საკონსულტაციო საბჭოს სხდომა

შიდა ქართლის სახელმწიფო რწმუნებულის ლევან ხარაბაძის ხელმძღვანელობით, ქარელში საკონსულტაციო საბჭოს მორიგი სხდომა გაიმართა. შეხვედრას მუნიციპალიტეტების მერები, საკრებულოს თავმჯდომარეები, მათი მოადგილეები და სახელმწიფო რწმუნებულის ადმინისტრაციის წარმომადგენლები დაესწრნენ.

სხდომაზე 2025 წელს რეგიონებში განსახორციელებელი პროექტების ფონდიდან დაფინანსებული პროექტების მიმდინარეობა, მათალმთიანი დასახლებების განვითარების ფონდიდან დაფინანსებული პროექტები, „სტიქიის შედეგების სალიკვიდაციო ღონისძიებების განხორციელების თაობაზე“ დაფინანსებული სამუშაოები და სოფლის მხარდაჭერის პროგრამის მიმდინარეობა განიხილეს. როგორც მუნიციპალიტეტების მერებმა აღნიშნეს, ინფრასტრუქტურული სამუშაოები გეგმის მიხედვით მიმდინარეობს. გარდა ამისა, საბჭოს წევრებმა შიდა ქართლის რეგიონში განსახორციელებელი ახალი პროექტებიც მოიწონეს.

შიდა ქართლში სახელმწიფო რწმუნებულთან არსებული სამხარეო საკონსულტაციო საბჭო 3 თვეში ერთხელ იკრიბება.



ხაშურის მუნიციპალიტეტში სამოქალაქო (მონაწილეობით) ბიუჯეტირების პროექტი დაიწყო



ხაშურის მუნიციპალიტეტის მერის, თენგიზ ჩიტიაშვილის ინიცირებით სამოქალაქო (მონაწილეობით) ბიუჯეტირების სამუშაო ჯგუფის პირველი შეხვედრა გაიმართა.

შეხვედრას ესწრებოდნენ ხაშურის მუნიციპალიტეტის საკრებულოს თავმჯდომარე ნინო ლიპარტელიანი, მერის პირველი მოადგილე გიორგი პაპიაშვილი და სამოქალაქო ბიუჯეტირების სამუშაო ჯგუფის წევრები.

მუნიციპალიტეტის მერიის საფინანსო-საბიუჯეტო სამსახურის ხელმძღვანელმა ლელა მაჭარაშვილმა დამსწრეებს გააცნო მონაწილეობითი ბიუჯეტირების პროცედურები.

განისაზღვრა ხუთი ლოკაცია, სადაც მიმდინარე წელს სამოქალაქო (მონაწილეობით) ბიუჯეტირების პროექტები განხორციელდება. ესენია ცხრაშენის ადმინისტრაციულ ერთეულში შემავალი სოფლები დამჩხულა და რბონა, ოსიაურის ადმინისტრაციულ ერთეულში შემავალი სოფლები ღუდა და ნარუჯევი და წრომის ადმინისტრაციული ერთეულში შემავალი სოფელი ყელეთი.

ადგილობრივ ბიუჯეტში პროექტისთვის 400 000 ლარია გამოყოფილი, საიდანაც სოფელ რბონისთვის, დამჩხულასა და ყელეთისთვის თითოეულზე 100 000 ლარი დაინარჩება, ხოლო ღუდასა და ნარუჯევისთვის გამოყოფილი თანხა თითოეული სოფლისთვის 50 000 ლარს შეადგენს.

სამოქალაქო (მონაწილეობით) ბიუჯეტირების პროექტის მიმდინარეობა, ასევე მასში ჩართულობის პირობები სისტემატურად გაშუქდება და მოქალაქეები ინფორმაციას ამომწურავად მიიღებენ პროექტის მიმდინარეობის შესახებ.

დაბა სურამში, ცენტრალურ სკვერში არსებული კინოთეატრის რეაბილიტაცია აქტიურად მიმდინარეობს

„სურამში, კინოთეატრი, დიდი ხანია არ ფუნქციონირებდა. განსაკუთრებული ძალისხმევა მივმართეთ კინოთეატრის შენობის მუნიციპალიტეტის საკუთრებაში გადმოსაცემად. ამჯერად, კინოთეატრის სრული რეაბილიტაცია მიმდინარეობს, შენობა-სამუსიკო სკოლას და სურამის ბიბლიოთეკას გაერთიანებს. აქვე გადავა სურამის ადმინისტრაციულ ერთეულში მერის წარმომადგენლის ოფისიც. განახლებული შენობა ჩვენი საყვარელი სურამის ცენტრს ახალ ხიბლსა და სიცოცხლეს შემატებს. მისი დიზაინის მომზადებაში უშუალოდ ვიყავი ჩართული და ვფიქრობთ, ძალიან ლამაზი გამოგვივა“- აღნიშნა სამუშაოების დათვალიერებისას ხაშურის მუნიციპალიტეტის მერმა თენგიზ ჩიტიაშვილმა.

ხაშურის მუნიციპალიტეტის მერის პირველი მოადგილის გიორგი პაპიაშვილის განმარტებით, დაბა სურამში, ცენტრალურ სკვერში არსებული კინოთეატრის რეაბილიტაციის სამუშაოებს მთლიანად მუნიციპალიტეტი აფინანსებს და ღირებულება 1 941 000 ლარს შეადგენს.



ხაშურში, შინდარის დასახლებაში, სკვერის მოწყობა დასასრულს უახლოვდება

„სივრცე ძალიან ლამაზი გამოვიდა და ვფიქრობთ, ადგილობრივების საყვარელი ადგილი გახდება. დამონტაჟდა დასასვენებელი სკამები, ფანჩატურები, საბავშვო ატრაქციონები, განათებები. აშენდა მინი სტადიონი, დაირგო სხვადასხვა ტიპის ხე-მცენარე.“- აღნიშნა ხაშურის მუნიციპალიტეტის მერმა-თენგიზ ჩიტიაშვილმა.

მერის პირველი მოადგილის, გიორგი პაპიაშვილის განმარტებით, სკვერის მოწყობის სამუშაოები, თანადაფინანსებით განხორციელდა და ღირებულებამ -389 646 ლარი შეადგინა.



- ეს ჩვენი ისტორიაა, ეს ჩვენი წარსულია -

თაგვეთის ბორანთან დაკავშირებული პირობის ხელწერილი

ხაშურის რაიონის სოფლებს საინტერესო გეოგრაფიული მდებარეობა აქვს. განსაკუთრებით, გასათვალისწინებელია თრიალეთის მთების კალთებზე შეფენილი მშენებრივი სოფლების (წრომი, ხცისი, მიწობი, კრისხევი, ხალეხი, რბონა, დამხნულა, თაგვეთი, ქაშვეთი და სხვ.) მტკვარსგაღმა არსებობა, რადგან მათთვის გამოდმა სამყაროსთან დასაკავშირებლად აუცილებელი იყო რაიმე სახის სამდინარო ტრანსპორტი, რადგან ის ხილები, რომელიც მათ დღევანდელი მუნიციპალიტეტის ცენტრთან აკავშირებს, ძალიან გვიან, მე-20 საუკუნის 60-იანი წლებიდან აშენდა.

ისტორიული ტრადიცია მოგვითხრობს, რომ საუკუნეების განმავლობაში ხაშურის მტკვარსგაღმა სოფლები საკმაოდ მჭიდროდ დასახლებული და მნიშვნელოვანი კულტურის ცენტრები იყო. საინტერესოა, რომ აქ მდებარეობს ქართული ქრისტიანული ხუროთმოძღვრების ისეთი ძეგლები, როგორცაა წრომი და ხცისი. სრულიად ბუნებრივია, ამ ტაძრების მიმდებარედ არაერთი დასახლებული პუნქტის არსებობაც. მართალია, მტკვარს გაღმა თრიალეთის ქედს, ისტორიულად, საურმე გზაც გაუყვებოდა, მაგრამ გამოდმა მხარესთან კავშირი მაინც აუცილებელი იყო.

გაღმოსვლით, ძველად მტკვარზე ბორნით გადადიოდნენ.

სწორედ, ამიტომ, ვვარაუდობთ, რომ სამდინარო ტრანსპორტის ისეთი სახეობა, როგორც ბორანი იყო, ჩვენი მუნიციპალიტეტის ტერიტორიაზეც ძველი დროიდან მოძრაობდა. თუმცა, მანამდე, მოდით, განვიხილოთ, ზოგადად, როგორი სამდინარო ტრანსპორტი იყო ის. ბორანს იყენებდნენ მდინარის ერთი ნაპირიდან მეორეზე გადასასვლელად, ეს იყო მორებისაგან შეკრული ბრტყელი ფართო ტივი, რომელსაც მგზავრობის უსაფრთხოებისთვის, ზოგიერთ შემთხვევაში, მოაჯირი ჰქონდა შემოვლებული. ის მოძრაობდა ბაგირის გასწვრივ, რომელიც მდინარის ორივე ნაპირზე იყო დამაგრებული. მეზობრნეები სწორი მოძრაობისთვის და მდინარის დინებასთან გამკლავებლად ორთაყვირებს იშვებდნენ. ბორნით გადასასვლელად ტვირთი, გადაჰყავდათ ადამიანები და ცხოველები. თბილისში არსებობდა რამდენიმე ბორანი, რომელიც ქალაქის ერთ ნაპირს მეორესთან აკავშირებდა.

XIX საუკუნის მეორე ნახევარში, ძველ ტფილისში, ციციანოვის აღმართი და მუხრანის ქუჩა ერთმანეთს მდინარე მტკვრის ნაპირებს შორის გაბმულ ბაგირზე მოძრაობდა ბრტყელი ნავით უკავშირდებოდა, რომელსაც „მუხრანის ხიდის ბორანს“ უწოდებდნენ. „მუხრანის ხიდის ბორანი“ აუცილებელ და საკმაოდ მომგებიან სატრანსპორტო საშუალებას წარმოადგენდა, რომლითაც ყოველდღიურად 2000-მდე ადამიანი სარგებლობდა მდინარის ერთი ნაპირიდან მეორეზე ტვირთის გადასასვლელად და საქონლის გადასაყვანად. ხშირად, წყალდიდობის დროს, ადილებული მტკვარი ბორანს იტაცებდა, რასაც, ხანდახან, მსხვერპლიც მოჰყვებოდა და მიმოსვლაც წყდებოდა. ამიტომ, ბორნის მიმდებარედ, სამაშველო პუნქტიც არსებობდა. მუხრანის ხიდის ბორანი ყოველწლიურად დაახლოებით 6000 მანეთ შემოსავალს იძლეოდა, როგორც ჩანს, ბორანი საკმაოდ შემოსავლიანი რამ იყო.

ბორნის არსებობის აუცილებლობა იდგა ჩვენი მუნიციპალიტეტის ტერიტორიაზეც, კერძოდ, მდინარე მტკვრის გაღმა და გამოდმა ნაპირების დასაკავშირებლად.

2024 წელს ბატონმა თამაზ ლაცაბიძემ ხაშურის მხარეთმცოდნეობის მუზეუმში ვეფხვაძეების უბნიდან შემოიტანა ძალიან საინტერესო დოკუმენტი, რომელიც გახლავთ პირობის ხელწერილი, დაღებული 1927 წელს თაგვეთელ მეზობრნეებსა და ბორნის ამორჩეულ მეთვალყურე კომისიას შორის.

პირობის ხელწერილის მიხედვით, სოფ. თაგვეთში მცხოვრებ ახლადარჩეულ მეზობრნეებს ვანო ჩაღუნელს, თედაოზ გელაშვილსა და ბორნის არჩეულ მეთვალყურე კომისიას (იასონ ტაპატაძე, სინო ჩაღუნელი და გოჩა გოგალაძე) შორის დაღებულია ხელწერილი, რომლის მიხედვითაც, მეზობრნეებმა ჩაიბარეს ბორანი თავისი გამართულობით (ორი ნაძვის ბოძი გაღმა-გამოდმა, ერთი ჯანრაკი თავისი ქედ მოწყობილობით, ერთი ძველი ვედრა, ხუთი ცალი ტახტის ფიცარი ძველი, ორი ცალი დაგრეხილი თოკებით, ერთი ბოყვი, სამი მსხვილი ჯაჭვი) მეთვალყურე კომისიისგან შემდეგი საგნებითურთ: ერთი ქოხი, ერთი პატარა შკაფი, მუხის ბოძი (დარსობილი), მუხის ჯირკი, ჯოჯგანა თოკით, ორი წისქვილის რუზე გაღებული პლასტინა, ოთხი პლასტინა კოზლასთან, ორი კოზლა გაღმა და გამოდმა, რა ნივთებიც, წლისთავზე უკან უნდა ჩაებარებინათ კომისიისთვის.

წლის განმავლობაში, მეზობრნეებს ყურადღება უნდა მიექციათ ბორნისთვის, რომ მძიმე ტვირთისგან არ დამტვრეულიყო, ან წყალდიდობის დროს, ან უპატრონო ტივისგან ან უბრალო ხე-ტყისგან ან მიუხედავად და ასეთ შემთხვევაში, მეზობრნეებს საკუთარი ხარჯით უნდა შეეკეთებინათ იგი, ხოლო თუ მსგავს შემთხვევაში ვერაფერს გახდებოდნენ, შეეტყობინებინათ, ბორნის მოწილადე გლეხების დახმარებით, მეთვალყურე კომისიისთვის და მათგან ყურადღების მიუქცევლობის შემთხვევაში, ყველაფერზე პასუხისმგებელი ხდებოდა კომისია და არა მეზობრნეები. თუ ბორანს რაიმე მასალა დაუძველდებოდა და დაუღებოდა და მისი შეცვლის აუცილებლობა იყო, კომისიის მიერ ყურადღების მიუქცევლობით გაჩერებული ბორნის გამო, მეზობრნეების ქირაც კომისიას უნდა აენაზღაურებინა იმასთან ერთად, რომ დამპალ-დაზიანებული ფიცრები ამოეცვალათ. ხოლო იმ შემთხვევაში, თუ კომისია მეზობრნეებს უფასო საჭირო ხის მოწმობას მისცემდა, გაღმა-გამოდმა ახალ კოზლებს გააკეთებდა; ხოლო რამდენიც უნდა დაჭირვებოდათ, თავად მეზობრნეებს უნდა გაეკეთებინათ მაღალი ნაძვის ბოძებით, ასევე, ახალი ჭანრაკი თავად მეზობრნეებს უნდა გაეკეთებინათ და წელიწადში ორჯერ უნდა გაეუეთათ. სხვა ასეთი წვრილმანი „პაჩინკაც“ თავად მეზობრნეების ვალდებულებაში შედიოდა. მათვე ევალებოდათ მთვრალი კაცისთვის ყურადღების მიქცევა, ასევე ნებისმიერი პიროვნებისთვის, რომ ის არ ყოფილიყო გაჩერებული ბორანზე გაუსვლელი გამო.

რაც შეეხება ქირას, ერთგარეშე პირზედ მეზობრნეებს ისე უნდა აეღოთ ქირა, როგორც კომისია გადაწყვეტდა. ხოლო წლიურად გარიგების შემთხვევაში, მეზობრნეებზე იყო დამოკიდებული, როგორ მოურიგდებოდნენ ამათუიმ კერძო პიროვნებას.

იმ შემთხვევაში, თუ ბორანში მოწილე რომელიმე ამხანაგს თავისი ოჯახის საჭიროებისათვის ან ექიმის გადაყვანა, ან მტკვრის ქვის რიყის გადატანა დასჭირდებოდა, მეზობრნეებს უფლება არ ქონდათ ქირის აღების. გასაყიდად მომზადებული ქვა-რიყის გადატანაში კი მეპატრონეს მეზობრნეებისთვის ქირა უნდა გადაეხადათ: ერთ ურემზე მანეთი. ეს მანეთიც ნაწილდებოდა: ხუთი შაური მეზობრნეებისა იყო, თხუთმეტი შაური კი ბორნის სასარგებლოდ უნდა ყოფილიყო გადახდილი.

მეზობრნეები ქირას იღებდნენ საფლავის ქვის გადატანის დროსაც: ხუთჩარეკიან ქვაზე 10 შაურს, საიდანაც სამი შაური მეზობრნეებისა იყო, 7 შაური კი ბორნის სასარგებლოდ გადაინახებოდა. მათ ამ ქირის შესახებ ანგარიში უნდა წარედგინათ მეთვალყურე კომისიისთვის, თუ რამდენი ურემი გავიდა ბორანზე. თუ მეზობრნეები

აღებულ ქირას გადაამალავდნენ და ანგარიშს არ გაასწორებდნენ, ხელი უნდა აეღოთ ბორანზე, ჭირნახულიც ბორნის სასარგებლოდ უნდა ჩაეტოვებინათ და სამომავლოდ ბორანზეც აღარ უნდა დაშვებულიყვნენ.

თუ პირობის ხელწერილის ორივე მხარიდან ერთი ვერ შეასრულებდა პირობას, უნდა გადაეხადა ჯარიმა 100 მანეთი ბორნის სასარგებლოდ.

გთავაზობთ აღნიშნული პირობის ხელწერილის სრულ ტექსტს (სტილი დაცულია):

პირობა

1927 წელსა, ივნისის 2-სა დღესა, ჩვენ, ქვემოთ ამის ხელის მომწერელი, სოფელ თაგვეთში მცხოვრებელი ახალათ არჩეული მეზობრნეები, ვანო ტაპატაძე ჩაღუნელი და თედაოზ მამუკას ძე გელაშვილი და ბორნის ამორჩეული მეთვალყურე კომისია სოფელ თაგვეთში მცხოვრებელი იასონ გარსევანის ზე ტაპატაძე და სინო სპირიდონის ძე ჩაღუნელი და სოფ. ქაშვეთში მცხ. გოჩა გიგოს ძე გოგალაძე ვლებთ ამ პირობას ერთმანეთს შორის შემდეგნაირად:

ჩვენ, ბორანზე მდგომი ამორჩეული მეზობრნეები ვიბარებთ ბორანს შემდეგი საგნებით თქვენ ამორჩეული მეთვალყურე კომისიის მიერ. ერთი სადგომი ქოხი, ერთი პატარა შკაფი, ერთი დასობილი დიდი მუხის ბოძი, ერთი დიდი მუხის ჯირკი, ერთი ჯოჯგანა თავისი თოკით, ორი პლასტინა წისქვილის რუზედ გაღებული, კოზლასთან ოთხი ცალი პლასტინა, ორი კოზლა გაღმა და გამოდმა, ბორანი თავისი გამართულობით, ერთი კან.იის რომელზედაც მუშაობს ბორანი, ორი ბოძი და ნაძვისა გაღმა-გამოდმა, ერთი ჯანრაკი თავისი ქედმოწყობილობით, ერთი ძველი ვედრა, ხუთი ცალი ტახტის ფიცარი ძველი, ორი ცალი დაგრეხილი თოკებით, ერთი ბლოკვი, სამი ჯაჭვი სხვილი, ეს ზემო აღნიშნული ქონება უნდა ჩაგაბაროთ წლის თავზედა თქვენ ამორჩეულ მეთვალყურე კომისიას. შემდეგი დღიდან თქვენ მიერ დავალებით უნდა სატიკი ყურადღება მივაქციოთ ბორნებს, რომ არ იქნეს მძიმე ტვირთ მზიდავლებისაგან დამტვრეული ან წყალდიდობის დროს. ისეთ შემთხვევის დროს, რომ უპატრონო ტივი მოქონდეს წყალს და ან სხვა რაიმე უბრალო ხეტყე და მით იქნეს დაზიანებული დამტვრეული ბორანი ჩვენს მიერ მიუხედავად, იმ შემთხვევაში ვალდებული ვართ თვით ჩვენ მეზობრნეები ასეთ დროს დამტვრეული ბორნები გავაკეთოთ ჩვენი ხარჯით. ასეთი საჭირო შემთხვევის დროს თუ ვერაფერი ღონის ძიებას გავხდით, შევატყობინოთ საერთოდ ბორანში მოწილადე შემომავალი გლეხების დახმარების შესახებ თქვენ ამორჩეულ მეთვალყურე კომისიას და თუ ყურადღება არ მიაქციო, იმ შემთხვევაში იქნებით თვით კომისია პასუხის მგებელი და არა ჩვენ. ბორანს თუ რაიმე მასალა დაუძველდა და დაუღაპა, თავითავად და საჭირო იქნა მისი გამოცვლა-შეკეთება, ვალდებული ვართ მეზობრნეები გაცნობოთ თქვენ, მეთვალყურე კომისიას, რათა იქნეს ის შეკეთებული საერთო მოწილადე გლეხობითგან უკეთუ ყურადღებას არ მოგვაქცემთ, მით იქნა ბორანი გაჩერებული, იმ შემთხვევაში უნდა გვინაზღაულოთ ჩვენი გაცდენის ქირა, ბორანს უნდა გამოუცვალოთ ამ პირველ შემთხვევაში როცა დაჭირდება ზეიდგან დაგებული დაზიანებული პიგარი, ის უნდა გამოუცვალოთ და დავაგოთ სხვა ახალი ფიცარი. იმ შემთხვევაში, თუ მოგვემთ უფასო საჭირო ხის მოწმობას, გაღმა-გამოდმიდან გავაკეთოთ ახალი კოზლები, ხიდი რამდენიც უნდა დაჭირდეს დიდწყლობის დროს, ის უნდა გავაკეთოთ თვით ჩვენ მეზობრნეებმა, გაღმა-გამოდმი უნდა გავაკეთოთ ახალი მაღალი ნაძვის ბოძებით, უნდა გავაკეთოთ ახალი ჭანრაკი, კანათ უნდა იქნეს გაზეთილი წელიწადში ორჯერ, ესეიგი რაც არ უნდა დაჭირდეს, ასეთი წვრილმანი



ბორანი ხცისთან. 1958 წლის 30 აპრილი წარწერა ფოტოზე: „ნადიას ქორწილის შემდეგ“

პაჩინკა ის უნდა გავაკეთოთ ჩვენ მეზობრნეებმა და უნდა ჩავტოვოთ წლისთავზედ ჩვენი გამოცვლის დროს ბორნის სასარგებლოდ და აგრეთვე უნდა მივაქციოთ ყურადღება თვრად კაცს და ერთ მიმავალ პიროვნებას, რომ ის არ იქნეს გაჩერებული ბორანზე გაუსვლელი გამო. გარეშე პირზედ ქირა უნდა ავიღოთ როგორც არის თქვენ კომისიის მიერ გადაწყვეტილი ერთ კაცზედ, როგორც სხვა მეზობრნეები იღებენ. აგრეთვე ვისაც წლიურათ სურს გაგვირიგდეს, ის ჩვენზედაა დამოკიდებული, როგორც მოურიგდებით. ამასთან ერთად, როგორც არის თქვენ კომისიის მიერ დადგენილი, თუ ბორანში მოწილადე რომელიმე ამხანაგს მიჰამს თავისი ოჯახის საჭიროებისთვის... ან ექიმი იმაზე არ გვაქვს თქვენს მიერ უფლება ავიღოთ ქირა. აგრეთვე თუ რომელიმე მოწილე ბორანშიდ ამხანაგს გაქვს ბორანზედ თავისი ოჯახის საჭიროებისათვის ტკვრის ქვა-რიყე, იმაზედ არ გვაქვს უფლება ავიღოთ ქირა. და თუ მას მიაქვს ქვა-რიყე გასაყიდათ, მაშინ უნდა ავიღოთ ქირა ურემზე მანეთი. ხუთი შაური უნდა ავიღოთ მანეთიდან ჩვენ მეზობრნეებმა და თუთუთხმეტი შაური კი უნდა იქნეს ბორნის სასარგებლოდ შენახული. საფლავის ქვა-პომენიკებზედ ის უნდა ავიღოთ ურემზედ რაც ქვა-რიყეს გამოტანაზედ გადაწყვეტილი ქირა მყიდველისგან, პატარა ხუთჩარეკიან ქვაზე კი უნდა ავიღოთ ათი შაური. სამი შაური იქნება ჩვენს სასარგებლოდ ბორნის ქირაში აღებული და შვიდი შაური უნდა შევინახოთ ბორნის სასარგებლოდ. სამივეში ერთხელ უნდა მოგვეთ ანგარიში თქვენ არჩეულ ბორანის მეთვალყურე კომისიას თუ რამდონი ასეთი ქირის ურემი გვიდა ბორანზედ და ჩაგაბაროთ სრული ანგარიში ფული. უკეთუ ჩვენ შეგავაჩნდა გადავმალეთ აღებული ქირა და არ გაგისწოროთ სრული ანგარიში იმ შემთხვევაშიდ ხელაღებული ვიყოთ მეზობრნეებზე, შემოსავალი ჭინახულიც ბორნის სასარგებლოდ ჩავტოვოთ თუ ასეთი რაიმე სიცუდე დაგვიმტკიცდა, ჩვენთაგან ოჯახის წევრს, რომელსაც არ შეუძლია ბორანზე დგომა და მისი მუშაობა, ისეთი წევრი არ იქნება დაშვებული ბორანზე

ჩატარდა უფასო კვლევები

„დაავადებათა ადრეული გამოვლენა და სკრინინგის“ სახელმწიფო პროგრამის „კიბოს სკრინინგის“ კომპონენტის ფარგლებში, ქალაქ ხაშურში, სს „საქართველოს კლინიკები“ ხაშურის პოსპიტალთან (რუსთაველის ქ#40) მპს ნიქოზის სამედიცინო ცენტრმა, კვლევები ჩატარა:

- ძუძუს კიბოს სკრინინგი (40-70 წლის ქალებისთვის)
- საშვილოსნოს ყელის კიბოს სკრინინგი (25-60 წლის ქალებისთვის)
- პროსტატის კიბოს მართვა (50-70 წლის კაცებისთვის)
- მსხვილი ნაწლავის კიბოს სკრინინგი (50-70 წლის კაცებისთვის და ქალებისთვის)

სკრინინგი ონკოლოგიური დაავადებების ადრეული დიაგნოსტიკის საუკეთესო საშუალებაა. ადრეული დიაგნოსტიკა კი, თავისთავად, პოზიტიურად აისახება დაავადების მკურნალობის შედეგებსა და გადარჩენის მაჩვენებელზე. სწორედ ამიტომ, საქართველოში, ისევე, როგორც მსოფლიოს მრავალ ქვეყანაში, მოქმედებს კიბოს სკრინინგის უფასო პროგრამები.



სურამში, აქტიურად მიმდინარეობს ინფრასტრუქტურული მშენებლობა

ამ ეტაპზე ეწყობა აღმამშენებლის მეორე ჩიხი.

„დაბა სურამში, ბოლო წლებში, არაერთი ქუჩის რეაბილიტაცია განვახორციელეთ და ეს ტენდენცია უწყვეტად გაგრძელდება. ამ ეტაპზე, მიმდინარეობს აღმამშენებლის მეორე ჩიხში ტერიტორიის მოსამზადებელი სამუშაოები, რათა მოხდეს ტერიტორიის მოწყობა.“ -აღნიშნა ხაშურის მუნიციპალიტეტის მერმა თენგიზ ჩიტიაშვილმა სამუშაოების დათვალიერებისას.

ხაშურის მუნიციპალიტეტის მერის პირველი მოადგილის გიორგი პაპიაშვილის განმარტებით, სურამის საგზაო მშენებლობა, თანადაფინანსებით ხორციელდება და ღირებულება 87 528 ლარს შეადგენს.

სასოფლო გზების მშენებლობა აქტიურად მიმდინარეობს

სოფელ ცხრამუხაში, შიდა გზები ეწყობა.

„სოფელ ცხრამუხაში, ტაძრამდე მისასვლელი გზის მშენებლობა ხორციელდება. პარალელურად მიმდინარეობს მეორე, მეტერთმეტე და ხმალაძეების უბნების მშენებლობა. ტენდენცია კვლავაც აქტიურად გაგრძელდება, რაც ადგილობრივების საყოფაცხოვრებო პირობებს მკვეთრად გააუმჯობესებს.“ -აღნიშნა ხაშურის მუნიციპალიტეტის მერმა თენგიზ ჩიტიაშვილმა სამუშაოების დათვალიერებისას.


ხაშურის მუნიციპალიტეტის მერის პირველი მოადგილის გიორგი პაპიაშვილის განმარტებით, ცხრამუხის საგზაო მშენებლობა, ადგილობრივი ბიუჯეტიდან ფინანსდება და ღირებულება 669 168 ლარს შეადგენს.



სოფელ გომში, შიდა გზების მონაკვეთების რეაბილიტაცია მიმდინარეობს.

სრულდება პირველი ფენა ასფალტის დაგება, რის შემდეგაც, დაიგება მეორე ფენა.

გომის საგზაო მშენებლობა, თანადაფინანსებით ხორციელდება და ღირებულება 896 297 ლარს შეადგენს.



ხაშურში, ინტელექტუალური თამაშის „ბიგ რაუნდის“ ნახევარფინანსისთვის შესარჩევი ტურები მიმდინარეობს

გასულ კვირას, ხაშურის მუნიციპალიტეტის მერი თენგიზ ჩიტიაშვილი, საკრებულოს თავმჯდომარე ნინო ლიპარტელიანი და მერის მოადგილე ზვიად გოგუაძე ესწრებოდნენ.

„ბიგ რაუნდი“ ის თამაშია, რომელიც უკვე წლებია მუნიციპალიტეტში აქტიურად და წარმატებით მიმდინარეობს. ზოგადად, ძალიან მნიშვნელოვანია ახალგაზრდული ღონისძიებებისა და აქტივობების ხელშეწყობა და ამისთვის ძალისხმევას არ ვიშურებთ, აღსანიშნავია, რომ მუნიციპალიტეტში, გვაქვს ორგანიზაცია „ახალგაზრდები ხაშურის განვითარებისთვის“ და მერის ახალგაზრდული მრჩეველთა საბჭო. ყოველთვის საჭიროა ახალგაზრდების ინტერესების გათვალისწინება და მოსმენა.“-აღნიშნეს ღონისძიებაზე მუნიციპალიტეტის ხელმძღვანელმა პირებმა.

წელს, შეჯიბრებაში, მუნიციპალიტეტის 22 სკოლის ინტელექტუალთა გუნდი მონაწილეობდა.

ნახევარფინანსში 8 სკოლის გუნდი გააგრძელებს ასპარეზობას. საფინანსო შეხვედრა, ზღვისპირეთში გაიმართება, გამარჯვებული გუნდის წარმომადგენლები დიპლომებით და ფასიანი საჩუქრებით დაჯილდოვდებიან.

ინტელექტუალური თამაში, ხაშურის მუნიციპალიტეტში, ყოველ წელს ტარდება და მისი მხარდაჭერები არიან: ხაშურის მუნიციპალიტეტის მერია, ადგილობრივი საგანმანათლებლო რესურსცენტრი და ორგანიზაცია „ახალგაზრდები ხაშურის განვითარებისთვის.“ ღონისძიების ორგანიზატორია მერიის განათლების, კულტურისა და სპორტის სამსახური.

- ფ ე ხ ბ უ რ თ ი -

დასაწყისიც ასეთი უნდა - „ივერია“ ლიდერია

ამ წერილის სათაურში გამოტანილი ფაქტი, იმის გათვალისწინებით, რომ ჯერ მეოთხე ლიგის ჩემპიონატის მხოლოდ ერთი ტური შედგა, ოდნავ ირონიულად ჟღერს, მაგრამ მთავარია, რომ ჭეშმარიტებაა და სატურნირო ცხრილში „ივერია“ პირველ ადგილზეა. სეზონი კი ჩვენმა გუნდმა ისეთი რიხით დაიწყო, რომ, ამის შემდეგ, ეჭვი მეპარება, რომელიმე გუნდმა, ხაშურში სტუმრობისას, გარანტირებული სამი ქულა დაგეგმოს. სტუმრად მოპოვებული სამი ქულა და ოთხი უპასუხო გოლი მართლაც ლამაზად ჟღერს და, როგორც იტყვიან დასაწყისიც ასეთი უნდა.

ხელვაჩაურში „ივერია“ თამაშის წინა დღეს გაემგზავრა, ისე, რომ დასვენებაც შეძლო და მსუბუქი ვარჯიშიც ჩაატარა. თამაშს კი ისეთი მობილიზებული შეხვდა, რომ „მაჭახელა“ საერთოდ გააქრო მინდვრიდან. ჩვენს ბიჭებს ყველაფერი გამოსდიოდათ - დრიბლინგი, გააზრებული გადაცემები თუ წინასწარ, მწვრთნელების მიერ ჩაფიქრებული ტაქტიკური ნახაზი. შედეგმაც არ დააყოვნა და პირველ ტაიმში ლუკა ბადრიაშვილის მიერ გატანილ გოლს, მეორე ტაიმში კიდეც სამი უპასუხო გოლი დაუმატეს (ს. ზაზიკაშვილი, ლ. ნოზაძე, ს. ჩხაიძე). „ივერიის“ სრული დომინაცია - ერთი

სიტყვით ასე შეიძლება შეფასდეს ეს მატჩი. სხვათაშორის, 3-5-2 ტაქტიკურ სქემას გასულ სეზონში, სტუმრად თამაშისას, „ივერიის“ მწვრთნელებმა ბევრჯერ მიმართეს და წარმატებითაც გამოიყენეს. ამ სქემაში გუნდი ბრწყინვალეაა შეთამაშებული და შესაძლებლობის მაქსიმუმსაც ავლენს. ასე იყო ამჯერადაც.

მოკლედ, „ივერიამ“ რიხით დაიწყო და დიდი იმედებიც ჩაგვისანა გულშემატკივრებს. თუ სათანადო დაფინანსება გამოინახა, სულაც არაა მიუწვდომელი ოცნება, რომ ჩვენმა გუნდმა კიდეც ერთი ნაბიჯით წაიწიოს წინ და შარშანდელი ტრიუმფი გაიმეორეს. გუნდის პროგრამა მაქსიმუმაც ესაა და დანარჩენს დრო გვიჩვენებს. „მაჭახელასთან“ კი „ივერიამ“ ასეთი შემადგენლობით ითამაშა: დერევიჩენკო, ზუმბაძე, ჭანკოტაძე, კაპანაძე, მანარობლიძე, ტ. ჩადუნელი (ლ. ნოზაძე), ს. ხაჩიძე, ივანაშვილი, ბადრიაშვილი (ო. ხაჩიძე), ზაზიკაშვილი (ჩხაიძე), გ. ნოზაძე (მურჯიკნელი).

ზეგ, 9 აპრილს „ივერია“ უკვე სახლში ხსნის სეზონს. ჩვენი მეტოქე ლანჩხუთის „გურია“ იქნება, რომელიც ამ ლიგის ერთ-ერთ ფავორიტად მიიჩნევა. იმედია, როგორც ყოველთვის, გულშემატკივრები სტადიონს მთლიანად გაავსებენ და მათი მხურვალე მხარდაჭერით, არსებულ სამ ქულას კიდეც ამდენივე მიემატება.

გოგი გოგოლაძე

ხაშურის მუნიციპალიტეტის ადმინისტრაციულ შენობაში, საბიბლიოთეკო სივრცე გაიხსნა

საზეიმო ღონისძიებას, ხაშურის მუნიციპალიტეტის მერი თენგიზ ჩიტიაშვილი, საკრებულოს თავმჯდომარე ნინო ლიპარტელიანი, მერის მოადგილე ზვიად გოგუაძე და მუნიციპალიტეტის წარმომადგენლები ესწრებოდნენ.



„მედიათეკის გახსნამდე, სწორედ ამ სივრცეში იქნება მუნიციპალიტეტის ბიბლიოთეკა განთავსებული. გადმოვიდა წიგნადი ფონდი, მკითხველისთვის შესაძლებელი იქნება, ისარგებლოს როგორც წიგნადი ფონდით და ბეჭდური მედიით, ასევე ინტერნეტით. იმედი გვაქვს, ეს სივრცე ყველა ასაკისა და სოციალური მდგომარეობის ადამიანის ინტერესებს დააკმაყოფილებს.“ - აღნიშნეს მუნიციპალიტეტის ხელმძღვანელმა პირებმა.

ღონისძიების საპატიო სტუმარი იყო ეროვნული ბიბლიოთეკის დირექტორი კონსტანტინე გამსახურდია, რომელმაც, ხაშურის მუნიციპალიტეტის ბიბლიოთეკას, ეროვნული ბიბლიოთეკის სახელით, საჩუქრები გადასცა.

ხაშურის ბიბლიოთეკის ღონისძიებაში, სხვადასხვა შემოქმედებითი ჯგუფები და სკოლის მოსწავლეები მონაწილეობდნენ.



პატარა მოჭადრაკეებმა საქართველოს პირველობის ლიცენზიები მოიპოვეს

გასულ კვირას, გორში, სხვადასხვა ასაკის მოჭადრაკეთა შორის, საქართველოს პირველობის შესარჩევი რეგიონული ტურნირი გაიმართა. ალექსანდრე ჭადაშვილის მიერ დამოძღვრილმა ჩვენმა პატარა მოჭადრაკეებმა მართლაც ტრიუმფით ჩაატარეს მთელი ტურნირი და მედლებით დახუნძლულები დაბრუნდნენ. ჩემპიონები გახდნენ: ალექსანდრე აკოფაშვილი (12 წლამდე), კესო კილაძე (12 წლამდე), ლაზარე ლიჩელი (10 წლამდე). ვერცხლის მედალოსანი გახდა ანდრია კახიშვილი (12 წლამდე). გაბრიელ ბლუაშვილი კი (8 წლამდე) ბრინჯაოს მედალი მიიღო. აღსანიშნავია, რომ ჩვენმა პატარა მოჭადრაკეებმა საქართველოს პირველობის ლიცენზიები მიიღეს.



ეს ტურნირი 5-15 მაისს გაიმართება თბილისში. აღსანიშნავია, რომ აქ პირველ-მეორე ადგილებზე გასული მოჭადრაკეები უკვე ევროპისა და მსოფლიო პირველობებზე მიიღებენ მონაწილეობას. როცა ჩვენი სპორტსმენების ბოლოდროინდელ საოცარ პროგრესს ვაღვივებთ თვალს, სრულებითაც არ გვაქვს ფუჭი იმედი, რომ ხაშურის სახელი ამ ტურნირებზეც გაიჟღერებს. მათი მწვრთნელი ალექსანდრე ჭადაშვილი მართლაც თანაა გადაყოლილი ამ ბავშვებზე და ეჭვიც არ გვაპარება, რომ ყოველდღიური ვარჯიშები და დაუღალავი შრომა შედეგს აუცილებლად მოიტანს.

აუტიზმის შესახებ ცნობადობის ამაღლების საერთაშორისო დღე აღინიშნა

ხაშურის მუნიციპალიტეტი შეუერთდა კამპანიას და მუსიკალური სკოლის მიმდებარე ტერიტორიაზე, ბავშვთა და მოზარდთა განვითარების, რეაბილიტაცია/აბილიტაციის ცენტრის პატარებისთვის სხვადასხვა აქტივობები გამართა.

ღონისძიებებს ესწრებოდნენ ხაშურის მუნიციპალიტეტის მერი თენგიზ ჩიტიაშვილი, საკრებულოს თავმჯდომარე ნინო ლიპარტელიანი, მერის მოადგილე ზვიად გოგუაძე და მუნიციპალიტეტის სხვა წარმომადგენლები, მათი განმარტებით, აუტიზმის მსოფლიო დღის აღნიშვნის მიზანია, გაზარდოს საზოგადოების ცნობიერების დონე აუტიზმთან დაკავშირებით. ასევე, ხელი შეუწყოს აუტიზმის მქონე ადამიანების ფუნდამენტური უფლებების დაცვასა და რეალიზაციას.

აუტიზმის შესახებ ცნობადობის ამაღლების დღესთან დაკავშირებით, ხაშურის მუნიციპალიტეტში განხორციელებული აქტივობების ორგანიზატორები იყვნენ ხაშურის მუნიციპალიტეტის მერიის განათლების, კულტურის, სპორტის სამსახური, ა(ა)იპ კულტურის ცენტრების გაერთიანება, ბავშვთა და მოზარდთა განვითარების ცენტრი-„საზოგადოება ბილიკი“.

აღსანიშნავია, რომ 2 აპრილი, აუტიზმის შესახებ ინფორმაციის გავრცელების მსოფლიო დღედ, 2007 წლის 18 დეკემბერს, გაეროს გენერალურმა ასამბლეამ გამოაცხადა.



ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.

E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.

♣-ით მონიშნული სტატია იბეჭდება დაკვეთით გაზეთი იბეჭდება თბილისში.